

## 2 Tímóti

*Ísu wíyómpa'a iyówana Póro moórá-waii úmai sísamaifakemba afakaeté-aataiya'iyó miyáumai-aatai maisuwéna Tímótin-imayaa éna maanáái agaimái tuwówana wenópa'a kuráiyé. Ísun-aaí simátíma'mae iyúnkakemba Rómu-naopa'a ándáfa'a ánkarowana ména Tímóti Fasi'aénkóni waásiya'o káráwiyontafena imáyáa éna maanáái agaimarówana wenópa'a kuráiyé.*

**1** <sup>1</sup>Tímótiyo kemá Póro maanáái maanáúfáífimbá agaimarúmpo isaaó. Maníkó wení imáyáafinkemba kentáféna séna aantá-waasi-i'a éma Ísu Káráísitin-aaí kosimátíma'mae núwo séna si'mákaiye. Maníkó óraaka'a séna Ísu Káráísitiye'a kááísamai méraamba pó'a aúí'a úmai maé'mae'a ónááwe siyáin-aaí kosimátíma'mae núwo séna si'mákaiye. <sup>2</sup>Tímótiyo kesáánimba óna'a sirumbó wéamundawi ómpo maanáái maanáúfáífimbá agaimarúmpo isaaó. Maníkó kentáásifowawe Ísu Káráísiti kentáási Fasi'aénkóe úwoi áwa'nai esarai tirumbá uwánkesarai faru uwánkaayantafe'a inái súné.

<sup>3</sup>Kesíwá'námo Maníkómbó arááíwakaantemba kemá miyá únana mindásafena kesirumpimbá ímba aaí wéraiye. Maníkómpá'ó inaimó súnnda entáfé'a imáyáa é'a aasiyaasí áisai e'a súwi simánkaumne. <sup>4</sup>Ifi'ó tasínkaraanda imáyáa é'a aneka'á awánánae-imayaa úmae wéiye'a embó awánaanda sirunkó óraa-kawe'a íniiye. <sup>5</sup>Ísu Káráísitin-aaisafemo amankúnkúmbo ónda ímbo óikakembo óndamo arumpinkémbó óndasafe'a imáyáa úne. Aifa'á enaráárán-áwí'a Róisi Maníkón-aaisafena amankúnkúmbo úwana minkákémbá enanón-áwí'a Yúnisi Maníkón-aaisafena amankúnkúmbo uráimba ewará'á miyá wée Maníkómpá'ó amankúnkúmbo ónda érai'a mindá ísaraumne. <sup>6</sup>Mindásafe'a simáme'a súné. Maníkómó fasi'aémbó ámakaimba ta'ótoke wení kísau mauwó. Maníkóni kísau mo máíndasafe'a siyáámba ane'á ta'ótoraawanana Maníkó fasi'aémbá ámakaiye. <sup>7</sup>Maníkó imáyáasa símakowata fasi'ámaisá méta ínta sáátafeta éta imáyáasa wétimeta kesúrata káráwimai kawe'á uréta úndasa po Maníkómó fasi'aémbó ámakaimba ta'ótoke wení kísau mauwó.

<sup>8</sup>Mindásafe kentáási Fasi'aénkó siyáin-aaimo simátimendasafena ímba áá'a íno. Fasi'aénkóni

waási-i'o úndarakemba ándáfa'a sínkaraawa'o méraundasafena ímba áá'a íno. Maníkó fasi'aémbá ámímba po ásé-ai simátímínasamo áí'o índa-i'o uwánkaiyamba sí'o úni'o uwásínkaraantembo uwánkaiyamba ímba imáyáamo indá fasi'ámai méraao. <sup>9</sup>Maníkó séna sáwí-imayaafinkemba faútínkáana'a kawe'-aantemba úmai méraaro siyáiyi. Kesáá

kawe-kísáúmó maúndasafenasa ímbanifo wení imáyáafinkemba séna úwoi túwa'nai ónaumne siyáimba póna kentáásí sáwí-imayaafinkemba faúsinkenasa séna kawe'-aantemba úmai méraaro siyáiyi. Áwáura'a Maníkó maramá ímbo úmakonka'a Ísu Káráisitini kísausafena imáyáa éna séna úwoi túwa'nai ónae'a to'mayaa úne siyáiyi. <sup>10</sup>Maníkó kentáásáfénawe séna to'mayaa úmakaimba paápé úwana Ísu Káráisiti marap'á kuména kentáásí sáwí-imayaafinkemba wéfausinkaiye. Waási púwówini áwáuma wemá iyáákéna taí'ásuwowasa wíyómpa'a aúí'a úmai maé'mae'a ésa ímba puwónááwe.

Minásé-áái paápé úwata ísaraumne.

<sup>11</sup>Minásé-ááímó simátíméndasafena Maníkó simásimena séna aantá-waasi-i'a éma ai'maráana maanáse-áái simátíma'mae núwo súwa'a <sup>12</sup>miyámó ówándarakemba sí'o úni'a úmai ándáfa'a sínkaraawa'a mé'a ímba sigaesáfé'a úne. Moóráwígon-aaisafe'o érai'emo sé'a wenká'ó simankúnkúmbo úndawimba awáné'a símakain-kisau káráwisa'a mináái érai'-aain-iyé súnnda pó'a ímba sigaesáfé'a úne. Maníkó waásimo méraawini áwáuma tísai índa-kanaa ímbo tiyáíndara'a símakain-kisau wégarawiye. <sup>13</sup>Tímótiyo érai'-aaimo simámakaunda arumpimbá ta'ótore arááíwae Ísu Káráisitiye'a kááísamai mé wenááisafe amankúnkúmbe wée wembá arumbá amé miyá úmae iyuwó. <sup>14</sup>Maníkó érai'-aaimo simámakaimba Maníkóní Ufaen-ámútánkó kentáásirumpimba méraimba po wení fasi'aéntámbá minéráí'-áái káráwiyuwo.

<sup>15</sup>Ésiyaa-marafaken-kwaasi seyaafá'á tínaaeni'o uwásiyukaampinkemba kae'-wáásí moóráwígon-awí'a Físérasí isaná moóráwígon-awí'a Émósénisi isamá mináái ísaraane. <sup>16</sup>Moóráwígon-awí'a Ónésíforasi kesópa'a tóso éna kawe'-áái simásimena kesí imáyáa aúí'a uwásínkena ándáfa'o méraunda ímba aigaesáféna isa'á mindásafe'a Fasi'aénkómpá'á inái súnnda Ónésíforasi wení naaúmpa'o méraan-kwaasiye kawé'á uwátinkainkwae sé'a inái súnne. <sup>17</sup>Wemá Rómu-naopa'a taména siyaafái émena ándáfa'o méraunda tasuwánéna kesí imáyáa aúí'a uwásínkaraiye. <sup>18</sup>Ááéma Éfésási-naopa'a koméraawanana sáwífa-kanaa wemá súwa'nai úwa é'a awánaraane. Miyámó uráintafe'a súnne. Fasi'aénkó waásimo méraawini áwáumo tísai índa-kanaa tínana Fasi'aénkó wentáféna arumbá uwánkainiye súnne.

**I-wáásímó fasi'ámaimo méraantemba miyáumai  
fasi'ámái méraaomo siyáin-aai.**

**2** <sup>1</sup>Kesááninkoo Ísu Káráísiti úwoi wéawa'nai-ifo fasi'ámái méraao. <sup>2</sup>Sáwífa'-waasi túranka'o simátimewanda-aai isé kawel-ímáyááwará'-wáási fasi'ámaimo méraawi kawel-úwaimo simátimiyawi simátímínasa miwíwará'á ta'ótokesa simátíméro.

<sup>3</sup>I-wáásímó umbai-tántáá'ó tímembo fasi'ámaimo máentemba Ísu Káráísitini waási-i'a óndarakemba embá umbai-tántáá'á ámémbanifo fasi'ámái méraao. <sup>4</sup>I-wáási miwítí óraako aamoí ínkwaé sésa wenáái wéaraaiwaesa ímba fi'o-fi'on-tantaatafesa imáyáamo iyamba óraakoni kisausafesa imáyáa wéowe. <sup>5</sup>Moóra'-aai isaaó. Tuwaantantésamo kontembá moóráwigomo wení óraakon-aaimo isénamo awaantanténamo iyénamo éna méyámbá máíníye. <sup>6</sup>Moóra'-aai isaaó. Kísauomo fasi'ámaimo owímó ombá tómbó fakaráán-kanaamo tisasá aifa'á fáká'mai wénaawe. Mináái imáyáa é Ísu Káráísitiye'a fasi'ámái méraao. <sup>7</sup>Simámunda-aai imáyáa inaná Fasi'aénkó imáyáa amína minááígóní áwáuma isáínone.

<sup>8</sup>Ísu Káráísiti Téftin-aísaafitantambo uráiwai puwénamo íyáfasinkaiwaintafe imáyáan-uwo. Mináái ásé-aai simátímakaunda-aain-íye. <sup>9</sup>Minásé-ááímó simátimewandarakemba ándáfa'a másínkesa sáwí'ó owímó tíyayaanka'o kárá'umaesamo mátinkaantemba kembá síyayaanka'a kárá'umaesa sí'ó iní'a úmai ándáfa'a másínkaraafo kemá úwoi ménaumpo Maníkón-aai go wété ínasa isáaro. <sup>10</sup>Mindásafe'a Maníkómó wemparí'ó úmáráin-kwaasisafe'a imáyáa é'a pó'a umbai-tántáátáfé'a ímba imáyáa é'a méraumne. Ísu Káráísiti miwítí sáwí-imayaafinkemba tí'maena kawepá'á métinkainasa sámó kain-áémpá'á maé'mae'ó íyantafe'a umbai-tántáátáfé'a ímba imáyáamo únda fasi'ámái méraumne.

<sup>11</sup>Maanáái érai'-aain-íye.

Ísu Káráísitiye'a kááísamaisa méraundasa póta puwétaamo éta weséta méranaumne. <sup>12</sup>Umbai-tántáá'ó ímbo imáyáamo éta fasi'ámaimo métaamo éta waásiya'ó káráwiyintemba kesááwará'á miyásá ónaumne. Sínaaembo uwámenanasaamo éna kentááwará'á miyá íníye.

<sup>13</sup>Wenáásafetaamo simankúnkúmbo urétaamo ifátúwáananasaamo éna wemó sintembó miyámó éna ímba kanaa'á tuwéna fi'on-aai síníye.

Mináái érai'-aain-íye.

**Maníkóní kísau arupise úmai maínana aamoí uwánkainomo siyáin-aai.**

<sup>14</sup>Tímótiyo Maníkón-aúranka'a maanáái símai táaka-tinke óraaka simátíma'mae iyé sé maanáái imáyáan-oro. Úwoi-aaisafe'a sáwífa'-aai sé'a

aaisambá wésefo mináái ifátúwáaro. Minááímó isáíyanamo éna minááígó ímba kawe'á uwátinkaina'a sáwí'a ónááfo súnda-aaí simátíma'mae iyuwó. <sup>15</sup>Maarán-kwáásí-í'o ónae sé maarán-uwo. Érai'-aaimo arupíse úmai simátímíndawima éma Maníkóní kísau-waasi éma ení kísausafe ímba aigaesáfé indawí éma miyámó émo e Maníkón-aúranka'o ménda simáména séna kawe'-úmai méraane síníye. <sup>16</sup>Úwoi-aaí Maníkómbó ímba arááfáwáén-kwaasimo sen-áái ánaaemba uwámuwo. Miyán-ááímó sen-kwáásí ímba Maníkóntáfésa imáyáa ésa sáwísáwí'a úmae wéiyowe. <sup>17</sup>Sowáéfítambo énamo seyaafá-túfá'ó intembá miwí tááigo wété ímbá pósa sáwí'a ónááwe. Miwífínkémbá kae'-wáásí túwí'a moóráwígon-awí'a Áíméniyasi isaná moóráwígon-awí'a Fáírítasi <sup>18</sup>minkáé'nárai érai'-aaí ifátuwesarai sésarai pukáundafínkenta'é'a iyáfasínkaunda póta ánaaemba aneká'á ínta iyáfasinanaumne séyasa isésa tuwímbai Ísu Káráísitin-aaisafesa kae'-ímáyáá wéowe. <sup>19</sup>Áfombo fasi'ámáimo faimaráántemba Maníkó áfonkaan-tantaa'a fasi'ámai faimaréna minká'á aúfái agaimaréna séna Fasi'aénkó wení waási'é'a tuwánaraiye séna moórá-aaí agaimaréna séna Fasi'aénkóní waási únemo sewí sáwí'o ombá tínaaemba uwáméro agaimaréna siyáíye.

<sup>20</sup>Moórá-aaimo simáménda isaaó. Óraa'-naumpa'a tuwímbai-taufá'a marésa tuwímbai korí-óntántámbó úmakaan-taufá'a marésa tuwímbai taaisambó úmakaan-taufá'a marésa tuwímbai agari'-márásámbó úmakaan-taufá'a marésa óraa-kanaa aantemba korí-táúfápínkémbá nésa úwoi-kanaa taai-taufápínkémbá wénaawe. <sup>21</sup>Simátímakaunda-sawí-kisauombo tínaaembo uwámesamo kawe'-úmaimo méraawi kawe-táúfákáámbá úmai mésa Maníkóntáfésa imáyáa wéesa Maníkómó kawe-kísáú timíndasafesa to'mayaa úmai méraawe. <sup>22</sup>Ifó'-wáásímó sáwí-tantaatafesamo tirááísafesamo ombá ánaaeni'a uwátíme arupíse úmai mérenda-imayaa é Maníkón-aaisafe amankúnkúmbó úmae iyí-ímáyáá wétime faru úmai mé tirumpímbó kawe'-aantembo imáyáamo ésamo Fasi'aénkómpá'ó áisai esamo súwa'nai ínkwaé sésamo ontembá miyán-uwo. <sup>23</sup>Úwoi-aaisafesamo sáwífa'-aaimo sembá minááíyákémbá aaisambó sembá ísaraampo ánaaeni'a uwátímiyo. <sup>24</sup>Fasi'aénkóní kísau-waasi ímba aaisambá sésa faru uwátinkesa kanaa'á aráátimesa aaisambó sembá tasí uwátinkesa <sup>25</sup>wempa'á mésa miwímó kentááimo taráíson-kwaasiti imáyáa kawe'á uwátinkesa miyámó íyanamo éna Maníkó imáyáa timínasawa Maníkómpá'á tésawa érai'-aaisafesa érai'e sénáá ína sénááo. Mindásafesa Fasi'aénkóní kísau-waasi amu'marésa méranaawe. <sup>26</sup>Waántáwanko ken-ímáyáá íwae séna miwí ta'ótokaiye. Érai'-aaisafesamo érai'emo sésamo ésa kawe'-ímáyáá ésa waántáwankomo ta'ótotuwenamo méraimpínkemba tufíntuwesa Maníkómpá'á ténááwe.

### Ánaaen-kanaagon-aaí.

**3** <sup>1</sup>Tímótiyo ánaaen-kanaamo tíndamo umbai-tántá'ó paapé índasafe imáyáan-uwo. <sup>2</sup>Minkánáará'á waási maará íyamba kesáfésa

aantemba aamoí ésa óntantafesa aamoí ésa kesáfésa kawe'-wáásí úne sésa kentúma maimaé wéiyesa tuwímbai símai sáwí'a uwátinkesa tinófoi-taai taraisésa túwa'nai owísáfésa ímba súwi sésa Maníkóntáfésa ímba imáyáa ésa <sup>3</sup>miwítí waási ímba imáyáa timésa ti'ó kaótuwe méraamba ímba aaweyáa ésa karo'-áái simátinkesa miwí túra'a ímba káráwiyesa tiyésa kawe-tántáátáfésa tífántafesa uwátinkesa <sup>4</sup>namuro-wáásísáfésa miwítí waási pintaru'á ésa sáwí'a uwátínkáaro sésa sáwí-amba ááema arááiwaesa miwí túma mósá marésa sáwí-tantaatafesa tirááisafesa ésa aamoí ésa Maníkóntáfésa ímba aamoí ésa <sup>5</sup>waási túranka'a Maníkóní waási úne karo'á sésa Maníkóní fasi'aémbá tínaaeni'a wéuwamefo miyámó on-kwáásí ánaemba uwátimiyo. <sup>6</sup>Miwífínkémbá tuwímbai fi'o-fi'on-daumpa'a iyésa ímbo kawe'-ímáyáámó on-ínintáfésa karo'-áái sewasá isésa miwí tááisafesa érai'e wésewe. Minínímbá aoisaambá owaná óraa'-i'a isasá miyá-sáwí-tántáá'á tirááisafesa owaná misáwí-tántáákó miníníntómbá ta'ótokaiye. <sup>7</sup>Miníníntómbá seyaafá'-wáásí táái isésa ímba kanaa'á tuwímbai isésa érai'-aai ta'ótokaawe. Mindásafesa miyán-káró'-wáásí tááisafesa érai'e wésewe. <sup>8</sup>Naaófá'á Mósesemo méronka'a kae'nárai-tuwi'a moóráwígon-awi'a Yánísi úwana moóráwígon-awi'a Yámbírísiye'o Mósesen-aaimo taráíyaayantemba minkáró'-wáásí miyáumai érai'-aai taraisésa imáyáa sáwí'a ésa tóikakemba Maníkón-aaisafesa érai'e wésefo <sup>9</sup>ímba óraaka'a miyá ónááwe. Miwí karo'-áái sésa méraamba tuwánésa sésa karo'-wáásín-owe sésa miwí táái ímba arááiwaenaawe. Naaófá'ó Yánísiye Yámbírísiye'o sirááyan-karo'-aaisafesa miyá siyáawe.

### Érai'-aai ta'ótore méraaomo siyáin-aai.

<sup>10</sup>Miwí miyá wéfo emá ímba miyá uráampo naaó'-naoken-kwaasi simátimunda-aai isé kemó méraundawini áwáuma suwáné kemó wénundawini áwáuma suwáné uréma po mináái wéaraaiwaene. Maníkómpá'á simankúnkúmba é'a faru úmai mé'a imáyáa timé'a umbai-tántáápímbó fasi'ámaimo méraunda-aai ísaraane. <sup>11</sup>Ántíoku-naopa'e Áíkóníyamu-naopa'e Rísítara-naopa'emo maéwándara'a umbai-tántáá'á simésa sí'o úni'a uwásínkówa'a ímba imáyáa é'o fasi'ámaimo maéwánda suwánaraane. Kempímbá óraa'-umbai-tantaa'a úmbanifo Fasi'aénkó mimpínkémbá síkaiye. <sup>12</sup>Ímba ken-aantemba sáwí'a uwásínkaraafo maarán-kwáásíwárá'á sáwí'a uwátinkanaawe. Ísu Kárásitiye'o kááisamai mé'a wentáfé'o imáyáa é'o mé'a miyá ónaemo sewí umbai timenááwe. <sup>13</sup>Sáwí-waasi karo'-áái sésa fi'owiti imáyáa kotafisewí sáwí'a úmae iyésa tuwímbai karo'á simátinkesa miwí karo'á simátiyuwanaawe. <sup>14</sup>Emá ímba miyá indá simátímakaunda-aaisafe érai'e fasi'ámai sé mináái fasi'ámai ta'ótoraa. Minéráí'-ááímó simátímakaundawisa kawé'-úmai suwánaraanda po mináái fasi'ámai ta'ótoraa. <sup>15</sup>Emá

iyámpói méron dara'a Maníkón-aai aúfáifinken-aai simátíma'mae iyúmba ísaraanda káfé'wara'a wéisaane. Maníkón-aai aúfáifinken-aai toráumaimo awánaawi kawé'-ímáyáá ésa Ísu Káráisitín-aaisafesa timankúnkúmba owaná Maníkó sáwí-imayaafinkemba wéfautinkaiye.

<sup>16</sup>Maníkó imáyáa timúwasa Maníkón-aai aúfáifimba seyaafá'-áái agaimakáamba pósa mináúfáifinkén-ááísámbá Maníkóní aamba aráátíméwasa aoisaambó uráantafesa óraaka sésa sáwí-imayaa arupíse uwátinkesa kawé'-aantemba úmai méraiyan-amba wéaraatimewe.

<sup>17</sup>Maníkóní kísau-waasimo Maníkón-aai aúfáifinken-aaimo ísámaimo kawé'ó íyanamo éna minááígó kawé-kísáú-wáási-í'a uwátinkainasa Maníkómó kawé-kísáúmó timínda-kísau fasi'ámai kawé'-úmai maenááwe.

**4** <sup>1</sup>Tímótiyo Maníkón-aúranka'e Ísu Káráisiti pukáan-kwaasiye túnaraan-kwaasiye miwítí áwáumo tísai índawín-aúranka'e óraaka simáme'a sune. Ísu Káráisiti marapá'ó kumínda-imayaa é'a wení waásiya'o kawáánínda-imayaa é'a óraaka simáme'a sune. <sup>2</sup>Seyaafá-kánáá Maníkón-aai óraaka simátíme kawé-kánáámó índa simátíme sáwí-kanaamo índa úwoi mindáwara'a simátíme wempakémbá simátímínana minááígó tirumbá waeráínasa isáiyamba miwítí imáyáa arupíse úmai fasi'átinke simátíma'mae wéiye ímba ifátuwaao. <sup>3</sup>Ánaaemba moórakanaa tínasa érai'-aai ímba ísámae iyónááfo káfé'a érai'-aai simátíma'mae iyuwó. Ánaaemba moórakanaa tínasa sáwí-tantaatafesa tirááísafesa ésa aamoí íyan-aai simátimiyán-kwaasisafesa tiyaafái ésa miwí táái aantemba isésa <sup>4</sup>érai'-aai tínaaemba uwámesa maní'-áái isáiyambanifo <sup>5</sup>emá fasi'ámai ménana umbai-tántáá'ó empá'ó tínda fasi'ámai méma Maníkón-aai simátíma'mae wéiye wení kísau maimái tai'aaó.

<sup>6</sup>Maníkóntáfésamo imáyáamo ésamo nombó fatiyóntemba kárika'a kembá Póromba sínkamiyana kesí naaegó miyáumai kumína'a puwónaumne. <sup>7</sup>Tuwaantantésamo kontembá kawé'-úmai wé'a ayáiyá'á komé'a Maníkóní érai'-aai ta'ótoke'a simátímakaunda <sup>8</sup>Fasi'aénkó kesí méyámbá tokáimba póna arupíse úmaimo méraunda-anonnda simíníye. Ánaaemba Fasi'aénkó arupíse úmai-meyambo timíndawi siména ímba ken-aantemba simínífo kumíndasafesamo aamoimó ésamo amu'makáawiwara'a wétimena simíníye.

<sup>9</sup>Tímótiyo úwoiyaambo kesópa'o tinda-ímáyáá

wéé méraao. <sup>10</sup>Moóráwígon-awi'a Tímasi marapá-tántáátáféna aamoí éna póna siyuwéna Tésaróníkaa-naopa'a kóisana moóráwígon-awi'a Kérésénisi Kérésíyaa-marafa'a kóisana moóráwigo Táítási Tárímésiyaa-marafa'a kóisana <sup>11</sup>Rúku weyáá kesé'a méraifo Máákaamba koái'mae tekaiyó. Mááka tasúwa'nai éna Maníkóní kísau tamáíno. <sup>12</sup>Moóráma Tíkíkaasimba ai'maráúnana Éfésási-naopa'a kóuraiye. <sup>13</sup>Ááéma Tóróasi-

naopa'a kesí wáá'a tuwááwánana Kápási káráwiyaifo maimaé téma aúfái-wandaaiwara'a aifaráán-tántáá'á kári'-aufaiwara'a maimaé tiyó.

<sup>14</sup>Moóráwígon-awi'a Árékísanda wení kísau kópaa-ontantambo tuwímbai-tantaa'o iwái óraa-sawi'a uwásínkáimba póna Fasi'aénkó anondáá sáwí-meyamba amíniye. <sup>15</sup>Maníkón-aaimo simátimewanda wemá símai taráísukaifo wembá káráwiyuwo.

<sup>16</sup>Aifarí'e'o aaimó simásínkáambo minááímó sénae'o únda seyaafá'-wáási ímba sáéfo tésa súwa'nai uwa'á Maníkóntáfé'a ímba anondáá sáwí'a uwátinkao sune. <sup>17</sup>Miwí ímba súwa'nai uwaná Fasi'aénkó súwa'nai ena fasi'aémbá símísa'a Maníkón-ai seyaafá'-ááímó simátímakaunda ímba Yúndaa-waasin-ifo fí'onkaa-waasi siyáunda ísaraawe. Áwáfíyaamo in-íyánkón-óipinkembo maiyauwénamo kawepá'ó móánkáintemba Fasi'aénkó aafimbó maisínkáámpinkemba síkena <sup>18</sup>sáwí'o uwásínkémpinkembo éna sí'mai wíyómpa'o wemó kawáánipa'a kawé'-úmai mósinkainiye. Wení sámó kaimbó waé'wae'o índa érai'-aain-iyé.

<sup>19</sup>Pírísikaante Ákwíraante simátime sé kawé'-úmai méraakaiyo siyó. Ónésíforasinte wení naaúmpa'o méraan-kwaasiye simátime sé kawé'-úmai méraaro siyó. <sup>20</sup>Érásítasi Kórinti-naopa'a méraisana Tóroffímasi áí'a úwa'a Máírítasi-naopa'a auwé'a tiyáumne. <sup>21</sup>Áú'o sin-kánáámó ímbo tiyáindara'a imáyáa é úwoiyaamba tiyó. Yúpíyúyasiye Píyúténisiye Ráínásiye Kíróndiyawe seyaafá'á Maníkóní waásiye entáfésa sésa kawé'-úmai méraao sewé.

<sup>22</sup>Fasi'aénkó kembiwísé'a ména úwoimo wétuwa'nai-intafe'a inái sune. *Kemá Póromo súnda-ai taí'áiye.*